

Broj: 01-02-3-1540/15
Sarajevo, 02.12.2015. godine

Z A P I S N I K
**4. REDOVNE SJEDNICE PREDSTAVNIČKOG DOMA PARLAMENTA
FEDERACIJE BiH, održane 17.11. i 01.12.2015. godine**

Sjednica je počela u 10.27.

Sjednici je predsjedavao predsjedavajući Predstavničkog doma Parlamenta Federacije BiH Edin Mušić.

Predsjedavajući Mušić pozdravio je zastupnice i zastupnike, potpredsjednicu i potpredsjednika Federacije, članove Vlade Federacije BiH, Međunarodne zajednice, kao i predstavnike akreditiranih medijskih kuća koji prate rad sjednice.

Odsustvo sa sjednice opravdali su: Ilhan Bušatlić, Halid Muhić, Nermin Nikšić, Damir Mašić, Ljuban Herceg i Mirsad Kukić, te ministar Amir Zukić.

Prema evidenciji Stručne službe, predsjedavajući je konstatovao da sjednici prisustvuje dovoljan broj zastupnika za kvalitetan rad i odlučivanje.

Prije nego se krenulo raditi potpredsjedavajuća Vesna Švancer obratila se Domu u vezi sa obavljanjem dužnosti potpredsjedavajuće.

Zapisnici 8. i 9. vanredne sjednice usvojeni su bez primjedbi.

Prešlo se na izjašnjavanje o predloženim inicijativama.

Inicijativa Kluba zastupnika HDZ1990 za smjenu potpredsjedavajućeg Mladena Boškovića nije usvojena (23 glasa za, 40 glasova protiv i bez uzdržanih glasova).

Inicijativa Jasne Duraković-Hadžiomerović prema RTVFBiH – u svrhu transparentnijeg informiranja javnosti o radu Parlamenta Federacije BiH, predlaže da do naredne redovne sjednice Parlamenta Federacije BiH, RTVFBiH, čiji je osnivač Parlament Federacije BiH, uživo prenosi sjednice Doma naroda i Predstavničkog doma, nije usvojena (42 glasa za, 25 glasova protiv i devet uzdržanih glasova).

Druga inicijativa Jasne Duraković-Hadžiomerović, kojom od predsjedavajućeg Predstavničkog doma Parlamenta Federacije BiH traži da poduzme neophodne aktivnosti kako bi se oformila služba za odnose sa javnošću i koncipirao, uskladio, usvojio i implementirao predloženi pravilnik o radu službe za odnose sa javnošću, koja će u narednom mandatnom periodu biti uvrštena kao sastavni dio/dodatni član općih odredbi tačke IV. Javnost rada Poslovnika Predstavničkog doma Parlamenta Federacije BiH, koja, na osnovu pojedinačnog izjašnjavanja, nije usvojena (48 glasova za, 30 glasova protiv i četiri uzdržana glasa).

Poslanička pitanja

Elvir Karajbić je, u ime Kluba zastupnika SDP, pokrenuo inicijativu prema zastupnicima u Predstavničkom domu Parlamentarne skupštine BiH da na narednoj sjednici spriječe imenovanje Nikole Poplašena za člana UO Agencije za razvoj visokog obrazovanja i osiguranja kvaliteta obrazovanja.

Amra Kunovac postavila je tri pitanja. Prvo pitanje - kakve se aktivnosti poduzimaju u cilju donošenja jedinstvene i obavezne procedure o načinu koordinacije nadležnih institucija na svim nivoima vlasti u oblasti zaštite okoline?

Drugo pitanje – kada će se pokrenuti aktivnosti na donošenju federalnog plana upravljanja opasnim otpadom?

Treće pitanje upućeno je Ministarstvu rada i socijalne politike - šta se može uraditi po pitanju penzionisanja žena koje imaju 20 godina radnog staža i više, ali i 60 godina starosti i da li one mogu biti obuhvaćene novim zakonom?

Alma Kratina pokrenula je inicijativu prema Federalnom ministarstvu zdravstva, kojom traži usklađivanje esencijalnih lista na nivou kantona, vezano uz broj trakica za aparate za mjerenje šećera u krvi za djecu dijabetičare Federacije BiH, kao i iste mogućnosti ostvarivanja prava na inzulinske pumpe za djecu dijabetičare u svim kantonima.

Pitanje je uputila Federalnom ministarstvu zdravstva – da li je sa federalnog nivoa pokrenut upit prema Ministarstvu civilnih poslova BiH vezano uz neophodnost donošenja krovnog zakona o transplantaciji organa i tkiva radi liječenja.

Elma Đogić pitanje je uputila Vladi Federacije BiH – na koji način je Agencija za privatizaciju Federacije BiH utrošila sredstva iz pasivnog podbilansa u iznosu 5 miliona 964 hiljade i 74,96 američkih dolara?

Drugo pitanje uputila je Vladi Federacije BiH, odnosno Federalnom ministarstvu finansija – da li su upoznati s tim da je mjesto budžetskog inspektora u Ministarstvu finansija Unsko-sanskog kantona već duže vrijeme upražnjeno i da u ovom kantonu nema kontrole nad općinskim budžetima? Da li će Federalno ministarstvo finansija na zahtjev izvršiti budžetsku kontrolu općinskog budžeta u ovom slučaju kada ne postoji budžetski inspektor?

Amra Haračić pokrenula je inicijativu prema Federalnom ministarstvu okoliša i turizma, kojim traži da se obustavi postupak davanja okolišnih dozvola za rad na području općine Lukavac, ta da u slučaju nastavka postupka davanja okolišnih dozvola ispoštuje obavezu na valjanu javnu raspravu.

Da li je ovakvo stanje zagađenosti zraka u Općini Lukavac u skladu sa Federalnom strategijom zaštite okoliša, koji bi trebao imati za cilj poboljšanje kvaliteta zraka? Šta je Federalno ministarstvo okoliša i turizma u okviru svojih nadležnosti učinilo za poboljšanje kvaliteta zraka u ovoj općini, koja je jedna od najzagađenijih u Evropi?

Boro Krišto pita - zašto se nije izjašnjavalo o inicijativi koju je zastupnik Vjekoslav Bakula pokrenuo na sjednici od 27.10.2015. godine?

Predsjedavajući Mušić dao je odgovor na postavljeno pitanje.

Boris Marjanović pitanje je uputio Javnom preduzeću "BH gas" a tiče se procesa plinifikacije na području Srednjobosanskog kantona, te kada se može očekivati nastavak tog procesa i izgradnja primarnog voda i sekundarne mreže?

Almir Zulić pitanje je uputio Vladi Federacije BiH i Agenciji za bankarstvo Federacije BiH – koliko ima banaka koje posluju na području Federacije, koji kriteriji određuju koje su banke u domaćem a koje u stranom vlasništvu, koliko imamo

domaćih a koliko stranih banaka i koje banke svoj profit zadržavaju u BiH i dalje ga investiraju u BiH?

Belma Pojskić pitanje je uputila federalnom ministru zdravstva i direktorici Federalnog fonda solidarnosti – budući da je novim Pravilnikom o dijalizi iz 2014. godine povećan broj medicinskog osoblja na dijalizi, konkretno u Kantonalnoj bolnici Zenica (gotovo tri puta), a sredstva koja se daju za dijalizu su ostala na istom nivou, pa pita na koji način će se uskladiti troškovi na dijalizi nastale zbog povećanog broja medicinskog kadra i sredstava koja se izdvajaju za dijalizu?

Jasmina Zubić kazala je da nije dobila odgovore na četiri postavljena pitanja sa prethodne sjednice.

Pitanje je uputila Ministarstvu obrazovanja Kantona Sarajevo, Institutu za medicinsko vještačenje, kantonalnim ministarstvima zdravstva i Federalnom ministarstvu zdravlja.

Prvo pitanje – u kojoj fazi je priprema novog Zakona o ombudsmenima za ljudska prava?

Drugo pitanje – da li je Vlada Federacije BiH uključena u rješavanje teške finansijske situacije u Općini Vareš i ako je odgovor potvrđan, traži kratak izvještaj o poduzetim aktivnostima.

Treće pitanje, na koje nije dobila odgovor, ponavlja – kada će se Zakon o šumama naći na dnevnom redu sjednice Doma naroda?

Boris Barun naglasio je da nije dobio odgovor na postavljeno pitanje sa prošle sjednice.

Pitanje je uputio federalnom ministru poljoprivrede, vodoprivrede i šumarstva – da li je formirana radna grupa za izradu prednacrtu Zakona o šumama i ako jeste po kojem kriteriju su izabrani i ko su članovi te radne grupe?

Oliver Radoš prvo pitanje uputio je Federalnom ministarstvu kulture i sporta – kakav je status Nacionalnog spomenika “Bobovac”, odnosno lokaliteta kraljevskog grada „Bobovac“, ko upravlja tim spomenikom, te kakvi su daljnji planovi o očuvanju, konzervaciji i zaštiti tog lokaliteta.

Drugo pitanje uputio je MUP-u kakva je sigurnost zgrade Parlamenta Federacije BiH?

Sead Jusić pitanja je uputio Ministarstvu odbrane BiH i traži da mu se dostave informacije o broju i procentu zaposlenih u Oružanim snagama BiH, Ministarstvu odbrane BiH na dan, 27.10.2015. godine u odnosu na Odluku o veličini strukture i lokacijama komandnih jedinica Oružanih snaga BiH i Ministarstva odbrane, koju je donijelo Predsjedništvo BiH a po komponentama: Bošnjaci, Hrvati, Srbi; kategorijama: oficiri, podoficiri, vojnici, civilna lica i državni službenici i po entitetima i kantonima.

Drugo pitanje je, također, uputio Ministarstvu odbrane BiH i traži da mu se dostavi informacija o broju zapošljavanja na osnovu javnih oglasa u Oružanim snagama BiH i Ministarstvu odbrane BiH u 2013., 2014. i 2015. godini, po entitetima, kantonima, nacionalnoj strukturi i kategorijama.

Treće pitanje - traži informaciju o broju upućenih na školovanje u 2013., 2014. i 2015. godini po entitetima, kantonima, nacionalnoj pripadnosti i kategorijama: kadeti komandno-štabna škola i škola operativno-strategijskog nivoa.

Četvrto pitanje - traži informaciju o broju, procentu obavljanja ključnih dužnosti u Oružanim snagama BiH i Ministarstvu odbrane BiH, formacijskog čina, brigadir i više, o nacionalnoj strukturi, entitetima, kantonima i općinama.

Marin Barbarić pitanje je uputio Federalnom ministarstvu poljoprivrede, vodoprivrede i šumarstva – koliko je do danas realizirano projekata iz paketa

Evropske investicione banke, ali i drugih (GEF, Svjetska banka, Evropska komisija i dr.) i u kojim općinama, odnosno u kojoj fazi se nalaze, te koji je stepen izvedenosti projekta iz oblasti vodoprivrede?

Jasmin Kadić pitanje je uputio predsjedavajućem Doma, a tiče se tehnike za prijavljivanje za poslanička pitanja.

Naredno pitanje uputio je RTVFBiH – kada će početi sa prijenosima sjednica Predstavničkog doma Parlamenta Federacije BiH, kako bi javnost od Javnog emitera, finansiranog od strane građana bila direktno informirana o radu Doma, a ne na temelju izvještaja novinara koji mogu biti subjektivni?

Pita Vladu Federacije BiH i Federalno ministarstvo energije, rudarstva i industrije – kakav je status Zakona o energetskej efikasnosti koji je usvojen u Predstavničkom domu Parlamenta Federacije BiH, a još nije razmatran u Domu naroda?

Predsjedavajući Edin Mušić odgovorio je na prvo pitanje zastupnika Kadića.

Adžem Dževad prvo pitanje uputio je Vladi Federacije BiH, odnosno Federalnom ministarstvu finansija – kojim iznosom od ukupnog vanjskog duga Federacije BiH Vlada obavezuje Bosansko-podrinjski kanton na osnovu supsidijarnih sporazuma između Vlade i ovog kantona, kada su potpisani sporazumi o zaduženju, za koje namjene i u kojem iznosu, te pregled otplatnog plana kredita?

Drugo pitanje uputio je federalnom ministru energije, rudarstva i industrije – koliko minihidrocentrala je izgrađeno na prostoru Federacije BiH, na koliko godina su vlade kantona potpisale svaki od koncesionih ugovora, koji je iznos koncesionog ugovora na godišnjem nivou za svaku od izgrađene minicentrale i ko su koncesionari? Koji su benefiti i da li se javno dobro građana javlja u formi nove vrijednosti?

Kasim Mulalić pokrenuo je inicijativu prema premijeru Vlade Federacije BiH i Federalnom ministarstvu energije, rudarstva i industrije i traži od nadležnih da se za narednu sjednicu dostavi cjelokupan i detaljan izvještaj o do sada provedenim aktivnostima i radnjama prema Odluci o finansijskoj konsolidaciji Privrednog društva “Agrokomerc” d.d. Velika Kladaša.

Imajući u vidu da je tokom 2014. godine nadležna poreska uprava započela postupak prinudne prodaje imovine “Agrokomerc” radi naplate javnih prihoda, a koje je obuhvatilo i imovinu na području općine Bužim u naselju Vareška Rijeka, smatra da bi se sa takvom idejom trebalo nastaviti. Vlada Federacije BiH 2010.godine donijela je Odluku o davanju saglasnosti za izuzimanje devastirane firme “Agrokomerc” u Vareškoj Rijeci za potrebe formiranja prve poslovne zone. Traži da se Vlada Federacije BiH obaveže da dostavi izvještaj sa pregledom pokazatelja rezultata finansijske konsolidacije i aktivnosti koje su provedene, da preispita mogućnost prijenosa prava raspolaganja imovine na lokalnu zajednicu ili da se ukine Odluka o finansijskoj konsolidaciji privrednog društva “Agrokomerc” d.d. Velika Kladaša kako bi se stvorili uvjeti za prodaju neiskorištenog zemljišta zainteresiranim investitorima. Predlaže i drugu varijantu da, ako je moguće, rješenjem nadležno ministarstvo isplanira sredstva u Budžetu za 2016. godinu kojim bi se ovi kapaciteti zaštitili od procesa prinudne prodaje i sačuvali kao najvažnija osnova privrednog razvoja Općine Bužim.

Hajrudin Havić pokrenuo je inicijativu za donošenje zakona o turističkim zajednicama i unapređenju turizma u Federaciji BiH.

Mahir Nurkanović predložio je resornom ministru kada je u pitanju novi Zakon o radu, a budući da su se javile mnoge dileme, da se napravi online pregled šta se sve izmijenilo i na šta se odnose promjene kada su u pitanju prava radnika.

Pokrenuo je inicijativu prema Federalnom ministarstvu poduzetništva da se osnuje online servis za pokretanje malog i srednjeg biznisa.

Treće pitanje uputio je Vladi Federacije BiH i Vladi Tuzlanskog kantona – postoji li mogućnost da se u budžetu za narednu godinu planira jedan dio sufinansiranja stanogradnje za mlade na području Tuzlanskog kantona, konkretno grada Tuzla?

Dario Knezović pitanje je uputio Federalnom zavodu za statistiku - da li će biti objavljeni službeni rezultati popisa stanovništva?

Jasna Duraković-Hadžiomerović pokrenula je inicijativu prema Federalnom ministarstvu rada i socijalne politike, kojim traži da se usvoje preporuke iz Izvještaja Ombudsmena za ljudska prava u BiH i ponude konkretna rješenja ili pak nacrt plana mjera za iznalaženje efikasnijih mehanizama odlučivanja po zahtjevu stranke za izuzeće Centra za socijalni rad, kojim bi spriječili i sankcionisali kršenje prava djeteta u sudskim postupcima, odnosno u slučajevima konfliktnih razvoda kojih je sve više na sudovima u Federaciji BiH.

Slavica Josipović prvo pitanje uputila je Vladi Federacije BiH – šta čini da se u Federaciji otvori adekvatan centar za djecu koja imaju autizam i da li se radi na tome da se imaju adekvatni stručnjaci u Federaciji?

Drugo pitanje uputila je Federalnom ministarstvu unutrašnjih poslova a osvrnula se na Dan sjećanja na žrtve saobraćajnih nesreća, te pita – koliko se uvozi starih automobila, šta se konkretno čini po pitanju edukacija, smatra da bi se trebalo izaći sa informacijom i prijedlogom mjera po ovom pitanju.

Mirela Halilović prvo pitanje uputila je federalnom ministru za rad, socijalnu politiku, raseljena lica i izbjeglice, te federalnom ministru za boračka pitanja – koliko na prostoru Federacije BiH ima registriranih RVI, odnosno koliko osoba prima naknadu po ovom osnovu i koliko je registriranih korisnika invalida po osnovu rada i drugim neradnim osnovama?

Drugo pitanje postavila je federalnom ministru nauke, kulture i sporta i traži statističke podatke o pismenosti u Federaciji BiH, te da li Ministarstvo ima uređenu zakonsku regulativu i neku vrstu plana kojim bi smanjili stopu nepismenosti u Federaciji?

Jusuf Bubica dao je određene prijedloge Vladi po pitanju izrade Zakona o šumama, navodeći i problem sječe šume na crno kao i korupciju. Također, što se tiče štednje građana na bankama, gdje od štednje dobiju samo 2% kamate, predlaže Vladi da izgradi neku kapitalnu investiciju ili neki značajan pogon gdje bi građani mogli da učestvuju svojim sredstvima kao partneri i da na taj način zaštite i korisno ulože svoj kapital.

Radoslav Luburić pitanje je uputio Federalnoj upravi za ceste i Federalnom ministarstvu prometa i veza – kada će se sanirati ili napraviti nova raskrsnica na dionici M6 Ljubuški - Čapljina (skretanje za Kravice), koja je opasna i nepregledna?

Safet Kešo osvrnuo se na problem smještaja predsjednika i dva potpredsjednika Federacije te je, u ime Kluba zastupnika SDA, zatražio od Vlade Federacije BiH, odnosno Službe za zajedničke poslove da u procesu rješavanja ovog organizaciono-tehničkog pitanja osigura ravnopravan i dostojanstven tretman predsjednika i dva potpredsjednika Federacije kako bi se izbjegla situacija u kojoj bi potpredsjednici bili podstanari kod predsjednika Federacije.

Ismet Kurić pokrenuo je inicijativu za izmjenu i dopunu Zakona o poljoprivrednom zemljištvu ("Službene novine Federacije BiH", br. 52/09), u dijelu člana 43. stav 1. i tako omogućiti jedinicama lokalne samouprave se vrate sporna zemljišta stvarnim vlasnicima.

Druga inicijativa kojom traži izmjenu i dopunu Zakona o električnoj energiji u dijelu koji rješava imovinsko-pravne odnose u članu 73. stav 3. važećeg Zakona koji je u suprotnosti sa odredbama Zakona o cestama.

Postavio je pitanje – kako je moguće da je Agencija za vodno područje rijeke Save izdala prethodnu vodnu saglasnost investitoru Javnom preduzeću Centar za upravljanje otpadom - regionalna deponija d.o.o. Bihać samo dva dana nakon obavljene javne rasprave u Bihaću?

Mirza Ganić prvo pitanje uputio je Agenciji za vodno područje rijeke Save – na području općine Visoko identifikovano je sedam lokacija na rijeci Bosni na kojima je potrebno izvršiti sanaciju. Jedna od navedenih lokacija je lokacija u naselju Dobrinje, koja je značajno ugrožena usljed poplava – da li je Agencija za vodno područje rijeke Save uvrstila u svoj plan rada i finansijski plan sanacije na spomenutom lokalitetu, te ako jeste, kada se očekuju aktivnosti.

Drugo pitanje uputio je Javnom preduzeću “Autoceste Federacije BiH” – izgradnjom autoputa na potezu Visoko - Kakanj, u naselju Seoča, općina Visoko, ugrožen je lokalni put i gdje je zbog nerješavanja imovinsko-pravnih odnosa onemogućeno kvalitetno odvijanje saobraćaja prema naselju Gornja Seoča. Da li je Javno preduzeće “Autoceste” upoznato sa ovim problemom i ako jeste traži informaciju šta poduzimaju po tom pitanju? Također, da li se ovaj problem trebao riješiti prilikom izvođenja radova na autoputu?

Prešlo se na utvrđivanje dnevnog reda.

Vlada Federacije BiH dostavila je pismo kojim traži uvrštavanje u dnevni red Prijedloga Zakona o izmjenama i dopunama Zakona o pripadnosti javnih prihoda u Federaciji BiH – hitni postupak i Prijedloga Zakona o izmjenama i dopunama Zakona o električnoj energiji u Federaciji BiH – hitni postupak. Predsjedavajući je predložio da se Dokument okvirnog Budžeta Federacije BiH 2016.-2018. godina povuče sa današnje sjednice jer će se razmatrati sa setom zakona koji tretiraju ovo pitanje.

Sa 51 glasom za, uz 21 glas protiv i uz tri uzdržana glasa, usvojeno je da se u dnevni red uvrsti Prijedlog Zakona o izmjenama i dopunama Zakona o pripadnosti javnih prihoda u Federaciji BiH – hitni postupak.

Sa 55 glasova za, uz 17 glasova protiv i uz dva uzdržana glasa, usvojeno je da se u dnevni red uvrsti Prijedlog Zakona o izmjenama i dopunama Zakona o električnoj energiji u Federaciji BiH – hitni postupak.

Sa 62 glasa za, uz četiri glasa protiv i uz 11 uzdržanih glasova, prihvaćeno je da se Dokument okvirnog Budžeta Federacije BiH 2016.-2018. godina povuče sa dnevnog reda.

Sa 52 glasa za, uz 22 glasa protiv i uz dva uzdržana glasa, usvojeno je da se Prijedlog Zakona o pripadnosti javnih prihoda u Federaciji BiH razmatra po hitnom postupku.

Nakon glasanja, Dženan Đonlagić izrazio je sumnju u rezultate glasanja te je na osnovu pojedinačnog izjašnjenja, sa 59 glasova za, uz 22 glasa protiv i uz jedan uzdržani glas, usvojeno da se Prijedlog Zakona o izmjenama i dopunama Zakona o električnoj energiji u Federaciji BiH razmatra po hitnom postupku.

Sa 59 glasova za, uz 17 glasova protiv i uz osam uzdržanih glasova, usvojen je sljedeći:

DNEVNI RED

1. Prijedlog Zakona o izmjenama i dopuni Zakona o pripadnosti javnih prihoda u Federaciji BiH – hitni postupak;
2. Prijedlog Zakona o izmjenama i dopunama Zakona o električnoj energiji u Federaciji BiH – hitni postupak;
3. Nacrt Zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom;
4. Nacrt Zakona o hraniteljstvu u Federaciji BiH;
5. Izvještaj o izvršenju Budžeta Federacije BiH za period od 01.01. do 01.06.2015. godine;
6. Izvještaj o radu Federalnog pravobranilaštva za 2014. godinu;
7. Godišnji izvještaj za 2014. godinu Visokog sudskog i tužilačkog vijeća BiH;
8. Godišnji izvještaj o rezultatima aktivnosti Institucije ombudsmena za ljudska prava BiH za 2014. godinu;
9. Izvještaj o dinamici Projekta izgradnje autoputa na Koridoru Vc br. 17 zaključno sa 30.06.2014. godine koji se finansira iz međunarodnog kredita EIB i EBRD;
10. a) Izvještaj o zaduženju Federacije BiH na osnovu emisije obveznica,
b) Izvještaj o zaduženju Federacije BiH na osnovu emisije trezorskih zapisa;
11. Informacija o vanjskom i unutrašnjem dugu u Federaciji BiH na dan, 31.12.2014. godine;
12. Informacija o poduzetim aktivnostima Vlade Federacije BiH, federalnih ministarstava, federalnih uprava i federalnih upravnih organizacija na saniranju posljedica prirodne nesreće u Federaciji BiH za period maj – august 2014. godine;
13. Informacija o sigurnosti na području Federacije BiH za period januar – juni 2015. godine;
14. Usaglašavanje različito usvojenih zakona u domovima Parlamenta Federacije BiH;
15. Izbori i imenovanja.

1. Prijedlog Zakona o izmjenama i dopuni Zakona o pripadnosti javnih prihoda u Federaciji BiH – hitni postupak

Prijedlog Zakona dostavila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dao je Hajrudin Hadžimehanović.

U raspravi su učestvovali: Nasir Beganović, Dženan Đonlagić, Jasmina Zubić, Sanel Razić, Boro Krišto, Radoslav Luburić, Jusuf Bubica, Mahir Nurkanović, Mirsad Topčagić, Munib Jusufović, Jasmin Kadić, Dževad Agić, Rasim Omerović, Ismet Osmanović, Elzina Pirić, Dževad Adžem i Mahir Mešalić.

Na Prijedlog Zakona amandman na član 2. podnijeli su zastupnici Mirsad Topčagić i Ismet Kurić, a koji Vlada nije prihvatila pa su od njega odustali.

Sa 69 glasova za, uz dva glasa protiv i uz dva uzdržana glasa, usvojen je Prijedlog Zakona o izmjenama i dopuni Zakona o pripadnosti javnih prihoda u Federaciji BiH.

Klub zastupnika HDZBiH - HNS predložio je zaključak o kojem su se zastupnici izjašnjavali.

Sa 50 glasova za, uz 12 glasova protiv i uz 15 uzdržanih glasova, usvojen je sljedeći:

Z A K L J U Č A K

Zadužuje se Federalno ministarstvo finansija, odnosno Vlada Federacije BiH da izradi novi cjelovit Zakon o pripadnosti javnih prihoda u Federaciji BiH i Nacrt Zakona dostavi Parlamentu Federacije BiH u roku 90 dana.

2. Prijedlog Zakona o izmjenama i dopunama Zakona o električnoj energiji u Federaciji BiH – hitni postupak

Prijedlog Zakona dostavila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dao je ministar Nermin Džindić.

U raspravi su učestvovali: Dženan Đonlagić, Elvir Karajbić, Dennis Gratz, Nasir Beganović, Ivan Musa, Mahir Mešalić, Jasmin Kadić, Munib Jusufović, Jasmina Zubić, Dževad Agić, Safet Kešo, Asim Kamber i Mahir Mešalić.

Nakon glasanja, Ismet Osmanović izrazio je sumnju u rezultate glasanja, te je na osnovu pojedinačnog izjašnjavanja, sa 50 glasova, uz 26 glasova protiv i uz jedan uzdržani glas, usvojen Prijedlog Zakona o izmjenama i dopunama Zakona o električnoj energiji u Federaciji BiH.

3. Nacrt Zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom

Nacrt Zakona dostavila je Vlada Federacije BiH.

Nacrt Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dao je ministar Vesko Drljača.

U raspravi su učestvovali: Elzina Pirić, Alma Kratina, Jasna Duraković-Hadžiomerović, Mira Ljubijankić, Elma Đogić, Amra Kunovac, Jasmina Zubić, Amra Haračić, Elvir Karajbić, Kenela Zuko, Munib Jusufović, Zana Marjanović, te ministar Drljača.

Sa 75 glasova za, bez glasova protiv i bez uzdržanih glasova, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom, te smatra da može poslužiti kao osnova za izradu prijedloga Zakona.

Zadužuje se predlagač da organizira i provede javnu raspravu u trajanju 30 dana u skladu sa odredbama Poslovnika Predstavničkog doma Parlamenta Federacije BiH o proceduri za organizaciju i provedbu javne rasprave.

Zadužuje se predlagač da prilikom izrade prijedloga Zakona ima u vidu sve sugestije, primjedbe i prijedloge iznesene u raspravi, kao i one koje su dostavljene ili će biti dostavljene u pisanoj formi.

4. Nacrt Zakona o hraniteljstvu

Nacrt Zakona dostavila je Vlada Federacije BiH.

Nacrt Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dao je ministar Vesko Drljača.

U ime Komisije za mlade obratila se Elzina Pirić.

U raspravi su učestvovali: Alma Kratina, Amra Kunovac, Mira Ljubijankić, Anela Šestić-Begović, Mira Grgić, Jasmina Zubić, Aiša Ćenanović, Emina Mutap, Nermina Zahirović, Amra Haračić, Azra Hadžić, Davor Vuletić, Almir Zulić, Boris Barun i ministar Drljača.

Sa 71 glasom za, bez glasova protiv i uz dva uzdržana glasa, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o hraniteljstvu u Federaciji BiH te smatra da može poslužiti kao osnova za izradu prijedloga Zakona.

Zadužuje se predlagač da organizira i provede javnu raspravu u trajanju 60 dana u skladu sa odredbama Poslovnika Predstavničkog doma Parlamenta Federacije BiH o proceduri za organizaciju i provedbu javne rasprave.

Zadužuje se predlagač da prilikom izrade prijedloga Zakona ima u vidu sve sugestije, primjedbe i prijedloge iznesene u raspravi, kao i one koje su dostavljene ili će biti dostavljene u pisanoj formi.

5. Izvještaj o izvršenju Budžeta Federacije BiH za period od 01.01. do 30.06.2015. godine

Izvještaj je dostavila Vlada Federacije BiH.

Izvještaj su razmatrala nadležna radna tijela i dostavila izvještaje.

U ime Vlade Federacije BiH dodatno obrazloženje dao je Pero Ivošević, pomoćnik ministricе Milićević.

U raspravi su učestvovali Mira Grgić, Elvir Karajbić i Radoslav Luburić.

Sa 50 glasova za, uz 28 glasova protiv i bez uzdržanih glasova, usvojen je Izvještaj o izvršenju Budžeta Federacije BiH za period od 01.01. do 30.06.2015. godine.

6. Izvještaj o radu Federalnog pravobranilaštva za 2014. godinu

Izvještaj je dostavilo Federalno pravobranilaštvo.

U ime Odbora za pravdu i opću upravu obratio se Davor Vuletić.

U raspravi su učestvovali: Elvir Karajbić, Zlatko Kravić, Faruk Ćupina, Dennis Gratz, Munib Jusufović i predstavnica Federalnog pravobranilaštva.

Predstavnički dom nije usvojio Izvještaj o radu Federalnog pravobranilaštva za 2014. godinu (10 glasova za, 42 glasa protiv i 25 uzdržanih glasova).

7. Godišnji izvještaj za 2014. godinu Visokog sudskog i tužilačkog vijeća BiH

Godišnji izvještaj dostavilo je Visoko sudsko i tužilačko vijeće BiH.

U ime VSTV dodatno obrazloženje dala je Ružica Jukić.

U raspravi su učestvovali: Davor Vuletić, Faruk Ćupina, Mira Grgić, Asim Kamber, Sead Jusić, Munib Jusufović, Zukan Helez, predstavnica VSTV i Ismet Osmanović.

Predstavnički dom nije prihvatio Godišnji izvještaj za 2014. godinu Visokog sudskog i tužilačkog vijeća BiH (sedam glasova za, 51 glas protiv i 14 uzdržanih glasova).

8. Godišnji izvještaj o rezultatima aktivnosti Institucije ombudsmena za ljudska prava BiH za 2014. godinu

Godišnji izvještaj dostavila je Institucija ombudsmena za ljudska prava BiH za 2014. godinu.

Predstavnica Ombudsmena Almedina Karić dala je dodatno obrazloženje.

U raspravi su učestvovali Davor Vuletić, Jasmina Zubić i predstavnica Institucije ombudsmena.

Sa 50 glasova za, uz 12 glasova protiv i uz šest uzdržanih glasova, prihvaćen je Godišnji izvještaj o rezultatima aktivnosti Institucije ombudsmena za ljudska prava BiH za 2014. godinu.

9. Izvještaj o dinamici Projekta izgradnje autoputa na Koridoru Vc br. 17 zaključno sa 30.06.2014. godine koji se finansira iz međunarodnog kredita EIB i EBRD

Izvještaj je dostavila Vlada Federacije BiH.

U raspravi je učestvovao Jusuf Bubica.

Predstavnički dom primio je na znanje Izvještaj o dinamici Projekta izgradnje autoputa na Koridoru Vc br. 17 zaključno sa 30.06.2014. godine koji se finansira iz međunarodnog kredita EIB i EBRD.

10. a) Izvještaj o zaduženju Federacije BiH na osnovu emisije obveznica b) Izvještaj o zaduženju Federacije BiH na osnovu emisije trezorskih zapisa

Izvještaj o zaduženju Federacije BiH na osnovu emisije obveznica (04.06.2015. i 31.08.2015.) i Izvještaj o zaduženju Federacije BiH na osnovu emisije trezorskih zapisa (08.06.2015.; 03.07.2015.; 27.07.2015.; 16.09.2015.; 28.09.2015. i 09.10.2015.) dostavila je Vlada Federacije BiH.

U ime Vlade Federacije dodatno obrazloženje dao je Vedad Nezirić, šef Odsjek za zaduživanje u Federalnom ministarstvu finansija.

U raspravi je učestvovala Alma Kratina.

Predstavnički dom primio je na znanje Izvještaj o zaduženju Federacije BiH na osnovu emisije obveznica i Izvještaj o zaduženju Federacije BiH na osnovu emisije trezorskih zapisa.

11. Informacija o vanjskom i unutrašnjem dugu u Federaciji BiH na dan, 31.12.2014. godine

Informaciju je dostavila Vlada Federacije BiH.

Predstavnik Vlade Federacije BiH dao je dodatno obazloženje.

U raspravi su učestvovali: Mahir Mešalić, Dženan Đonlagić, Ismet Osmanović, Dennis Gratz, Dževad Hodžić, Elvir Karajbić i Slavica Josipović.

Predstavnički dom primio je na znanje Informaciju o vanjskom i unutrašnjem dugu u Federaciji BiH na dan, 31.12.2014. godine.

Potpredsjedavajući Mladen Bošković prekinuo je rad sjednice u 20.54.

* * *

NASTAVAK 4. REDOVNE SJEDNICE PREDSTAVNIČKOG DOMA PARLAMENTA FEDERACIJE BIH, održane 01.12.2015. godine

Sjednica je počela u 10.25.

Sjednici je predsjedavao predsjedavajući Predstavničkog doma Parlamenta Federacije BiH Edin Mušić.

Predsjedavajući Mušić pozdravio je zastupnice i zastupnike, potpredsjednicu Federacije, premijera Vlade Federacije BiH, članove Vlade Federacije BiH, Međunarodne zajednice, kao i predstavnike akreditiranih medijskih kuća koji prate rad sjednice.

Odsustvo sa sjednice opravdali su: Belma Pojskić, Rusmir Mesihović, Halid Muhić i Darjana Katić.

Prema evidenciji Stručne službe, predsjedavajući je konstatovao da sjednici prisustvuje dovoljan broj zastupnika za kvalitetan rad i odlučivanje.

Predsjedavajući je pozvao da se minutom šutnje ili učenjem Fatihe oda počast ubijenim vojnicima Oružanih snaga BiH u Rajlovcu, kao i svim stradalim u terorističkim napadima koji su se desili u proteklom periodu.

Prešlo se na izjašnjavanje o dobivenim odgovorima.

Odgovorima su zadovoljni ili djelimično zadovoljni: Boris Barun, Alma Arnaut, Azra Hadžić, Jusuf Bubica, Blaž Župarić, Omer Škaljo, Amra Kunovac, Nasir Beganović, Boris Marjanović i Dennis Gratz. Odgovorima nisu zadovoljni: Radoslav Luburić, Helez Zukan, Ismet Kurić, Alma Kratina, i Dario Knezović.

Jasmina Zubić komentarisala je odgovor kojim nije zadovoljna a tiče se realizacije preporuke Institucije Ombudsmena broj: 85/15 od 26.03.2015. godine. Elma Đogić traži da joj se odgovori na pitanja koja je postavljala na 3. i 4. sjednici.

Mahir Mešalić kazao je da nije dobio pet odgovora od šest postavljenih pitanja. Ponovo pita Vladu, koliko deponovanih sredstava javnih preduzeća ima u bankama i u kojim? Ilhan Bušatlić komentarisao je odgovore na pitanja koja je uputio Federalnom ministarstvu unutrašnjih poslova i Federalnoj upravi policije (Federalna uprava policije nije odgovorila na pitanje), Također, komentarisao je odgovor Javnog preduzeća "Ceste Federacije". Damir Mašić osvrnuo se na odgovore i kazao da nije zadovoljan njihovim sadržajem. Dževad Adžem izrazio je nezadovoljstvo odgovorom koji je dobio od Federalnog ministarstva finansija. Muhamed Ibrahimović komentarisao je odgovor na pitanje u vezi sa stečajnim upravnikom.

Slavica Josipović dala je komentare na odgovore koje je dobila na četiri postavljena pitanja.

Poslanička pitanja

Mira Grgić je, u ime Kluba zastupnika SDP, pokrenula inicijativu da se na jednoj od narednih sjednica uvrsti tačka dnevnog reda - Prijedlog Zakona o liječenju neplodnosti biomedicinski potpomognutom oplodnjom i dala obrazloženje.

Esad Bašagić pitanje je uputio menadžmentu "Elektroprivrede BiH" a pita ko snosi odgovornost zbog kontinuiranih problema u snabdijevanju električnom energijom u općinama Unsko-sanskog kantona prilikom loših vremenskih uvjeta, šta se čini kako bi se to riješilo, posebno u općinama Cazin, Velika Kladuša, Bužim, Bosanska Krupa i Ključ, te kada će se izvršiti izmjena dotrajale niskonaponske mreže na području Unsko-sanskog kantona?

Mahir Nurkanović pokrenuo je inicijativu prema federalnom ministru trgovine, kojom predlaže da se nađe način kako bi se u našim trgovačkim lancima, na prostoru Federacije BiH, postavile posebne police na kojima bi bili izloženi proizvodi iz BiH.

Emina Mutap pitanje je uputila Javnom preduzeću Ceste Federacije BiH – kada će biti započeta temeljita sanacija Tunela "Crnaja", koji se nalazi na magistralnom putu M17, Konjic - Jablanica?

Elzina Pirić dva pitanja uputila je Federalnom ministarstvu energije, rudarstva i industrije. Prvo pitanje – ko su bili članovi stručnih komisija za vršenje tehničkog pregleda rudarskih objekata, postrojenja, uređenja instalacija; ako je neko bio u više komisija pita u koliko, na osnovu člana 47. Zakona o rudarstvu Federacije BiH u 2015. godini, te koliko su ostvarili naknada na osnovu rada u ovim komisijama?

Drugo pitanje - ko su bili članovi stručnih komisija za vršenje kategorizacije jama i jamskih slojeva po pitanju opasnosti od metana i ugljen-prašine? Ako je neko bio u više komisija, pita u koliko, na osnovu člana 71. stav 2. Zakona o rudarstvu Federacije BiH u 2015. godini, te koliko su ostvarili naknada na osnovu rada u tim komisijama?

Ramiz Meša pitanja je uputio Federalnom ministarstvu poljoprivrede, vodoprivrede i šumarstva - koliko poljoprivrednih gazdinstava, od ukupnog broja upisanih u registar, ostvaruje poticaje od Federalnog ministarstva, a koliko po kantonima, koliko je bilo zaposlenih u oblastima biljno-stočarske proizvodnje, šumarstva i ribolova u 2005. godini? Ima podatke za 2014. godinu za područje Federacije. Koliko je zaposlenih po kantonima u istim oblastima bilo u 2005. i 2014. godini?

Oliver Radoš pitanje je uputio Direkciji Cesta Federacije BiH - da li se mogu ubrzati radovi na magistralnom putu M17, odnosno na mostu, naselje Golubinja, općina Žepče, te da li će nakon završenih radova alternativni put biti presvučen asfaltom?

Mirza Ganić pitanje je uputio Regulatornoj agenciji za komunikacije - da li je imala informacije da je u 2014. godini bilo kablovskih operatera koji su radili bez dozvola za kablovsku distribuciju? Ako jeste, traži da mu se dostave informacije koji su to operateri i da li ih je Agencija kaznila, opomenula ili zabranila rad?

Kasim Mulalić kazao je da postoji opće nezadovoljstvo građana na području sjeverozapadnog dijela Bosne i Hercegovine, kada je u pitanju zbrinjavanje radioaktivnog i nuklearnog otpada Republike Hrvatske. Inicijativom traži maksimalan angažman svih institucija u Bosni i Hercegovini, na postizanju sigurnosti stanovnika BiH kada je u pitanju zbrinjavanje istrošenog goriva i radioaktivnog otpada koje je proizvedeno u susjednim zemljama. Na osnovu ove inicijative traži da se donese deklaracija o zaštiti prava građana Bosne i Hercegovine od štetnog djelovanja ove

vrste otpada. Zahtjeva da se građanima omogući pravo na izjašnjenje i odlučivanje o izgradnji ove vrste objekta, te redovno informiranje i izvještavanje nadležnih institucija i regulatorne državne agencije na način kako se nalaže međunarodnim pravnim normama u interesu države i zaštite njenih građana.

Pitanje je uputio Zavodu zdravstvenog osiguranja - kolika je visina prikupljenih sredstava na osnovu doprinosa za obavezno zdravstveno osiguranje na godišnjem nivou i kolika je visina prikupljenih sredstava prema svakom kantonu, kolika su ukupna utrošena sredstva za usluge lijekova koje se finansiraju iz Fonda solidarnosti, kao i visina tih sredstava po kantonima iz kojih dolaze osigurana lica, kolika su ukupna utrošena sredstva za troškove liječenja u inozemstvu, te koliki je udio u tim troškovima za svaki kanton pojedinačno? Traži podatke od 2012. zaključno sa oktobrom 2015. godine.

Bajro Makić pitanje je uputio Javnom preduzeću "Ceste Federacije BiH" – kada će početi rekonstrukcija tunela na magistralnoj cesti M5, dionica Donji Vakuf – Jajce?

Pokreće inicijativu za izimjenu i dopunu Zakona o prostornom planiranju i korištenju zemljišta na nivou Federacije BiH .

Radoslav Luburić pokrenuo je inicijativu prema Federalnom ministarstvu finansija da za 2016. godinu u smjernicama o određivanju udjela kantona i jedinica lokalne samouprave nadležnih kantonalnih ustanova za ceste u prihode od indirektnih poreza i načinu raspoređivanja tih poreza kao parametar uzmu preliminarne rezultate popisa stanovništva koje je objavio Federalni zavod za statistiku.

Alma Arnaut tri pitanja uputila je vezano uz Hercegovačko-neretvanjski kanton. Prvo pitanje uputila je Federalnom ministarstvu zdravstva – znajući da su bonice sa područja ovog kantona u velikim finansijskim dubiozama traži da navedu tačne iznose njihovih dugovanja po svim osnovama u prošloj godini i da li se taj dug i dalje akumulira ili se smanjuje? Koliko je Federalno ministarstvo zdravstva u prošloj godini dodijelilo sredstava zdravstvenim ustanovama sa područja Hercegovačko-neretvanskog kantona i na osnovu kojih kriterija su ta sredstva dodjeljivana?

Pitanje je uputila Federalnom ministarstvu obrazovanja – šta će učiniti u narednom periodu da prestane segregacija i diskriminacija učenika u osnovnim školama u Čapljini i Stocu, te da se konačno počne raditi na integraciji obrazovnog sistema.

Boro Krišto dva pitanja uputio je rukovodstvu Predstavničkog doma a tiče se inicijative koju je na prošlom zasjedanju pokrenuo zastupnik Vjekoslav Bakula a o kojoj se još nije izjašnjavalo pa pita da li su se promijenila pravila ili Poslovnik? Također, pitanje je postavio u vezi sa pločicama na kojima su obilježeni nazivi stranaka u Predstavničkom domu.

Predsjedavajući Mušić dao je odgovore na ova pitanja.

Sead Jusić osvrnuo se i komentarisao pitanje koje je postavio na prošloj sjednici u vezi sa strukturom Oružanih snaga BiH. Smatra da je to jako važno pitanje zato ga obnavlja i insistira na odgovoru.

Elma Đogić prvo pitanje uputila je Agenciji za državnu službu Federacije BiH – koliko je osoba zaposleno u državnoj službi u periodu od 01.01.2015. do 30.11.2015. godine i koliko osoba je zaposleno u državnoj službi po kantonima u navedenom periodu?

Sljedeće pitanje uputila je Vladi Federacije BiH, odnosno Federalnom ministarstvu finansija – zašto se dodjela finansijskih sredstava privrednim društvima

na kreditnoj osnovi ili bilo kakvi aranžmani takvog tipa ne realiziraju putem Razvojne banke Federacije?

Jasmina Zubić pitanje koje je već postavljala ponavlja i upućuje ga i kantonalnom ministarstvu obrazovanja i Federalnom ministarstvu obrazovanja – u kojoj fazi je realizacija preporuke Institucije ombudsmena broj P85/15 od 26.03.2015. godine, kojom se ukazuje na diskriminaciju u pogledu prava na besplatno školovanje djece iz kategorije porodica šehida i poginulih boraca, s obzirom na mjesto prebivališta u odnosu na mjesto gdje žele da se školuju?

Drugo pitanje uputila je direktoru Finansijsko-informatičke agencije - kada će biti formirana finansijsko-informatička agencija prema Zakonu o Finansijsko-informatičkoj agenciji (“Službene novine Federacije BiH”, br. 80/2011) i kada će biti donesena obavezujuća provedbena akta?

Pokreće inicijativu prema Federalnom ministarstvu finansija za odgodu primjene Zakona o unutrašnjem platnom prometu (“Službene novine Federacije BiH”, br. 48/2015) zbog neuspostavljanja finansijsko-informatičke agencije.

Ismet Osmanović prvo pitanje uputio je predsjedniku Federacije BiH – zašto je odugovlačio sa potpisivanjem Rebalansa Budžeta za 2015. godinu, koji zbog toga nije mogao stupiti na snagu kako je planirano, iako je usvojen po hitnoj proceduri?

Pokrenuo je inicijativu prema Vladi Federacije BiH da pripremi zakon kojim će se regulirati ovo pitanje i jasno precizirati kada, na koji način, koliko, u kojem periodu i pod kojim uvjetima je moguće odgoditi potpis predsjednika Federacije.

Pitanje je uputio RAK-u – koliko su postupaka iz svoje nadležnosti pokrenuli prema medijima koji nisu ispoštovali Odluku Vijeća ministara BiH o proglašenju Dana žalosti 11.07.2015. godine u cilju obilježavanja genocida u Srebrenici?

Alma Kratina prvo pitanje uputila je Federalnom ministarstvu za rad i socijalnu politiku a traži mišljenje o važećem Zakonu o ustanovama, odnosno utemeljenosti mišljenja o potpunoj prevaziđenosti ovog zakona i hitne potrebe za njegovim izmjenama, odnosno donošenju novog zakona iz obje oblasti.

Drugo pitanje uputila je Federalnom ministarstvu zdravstva – da li postoji procjena mogućnost uvođenja novih inovativnih lijekova za tretman onkoloških pacijenata putem Fonda solidarnosti i da li postoji mogućnost promjene načina nabavljanja onkoloških lijekova koji bi omogućili ljekarima pravo izbora?

Pokreće inicijativu prema premijeru Vlade Federacije BiH da razmotri mogućnosti izdvajanja posebnih sredstava u Budžetu Federacije za 2016. godinu koja će se namjenski trošiti za finansiranje stambenog zbrinjavanja mladih, a, po potrebi, i drugih kategorija građana iz reda sportskih i kulturnih radnika za koje se posebno utvrđenim kriterijima utvrdi značaj za Federaciju BiH i šire.

Jozo Bagarić pitanje je uputio federalnom ministru poljoprivrede, a tiče se Agromediteranskog zavoda Mostar, koji je nezakonito dobio ovlaštenja za ispitivanje zdravstvenog kvaliteta namirnica animalnog porijekla. Kazao je da su ti objekti koji se nalaze na Buni nezakonito uknjiženi u vlasništvo. Pita ministra šta će poduzeti po tom pitanju?

Amra Kunovac pokrenula je inicijativu za hitnu pomoć Domu zdravlja Foča - Ustikolina.

Prešlo se na rad po dnevnom redu sjednice.

12. Informacija o poduzetim aktivnostima Vlade Federacije BiH, federalnih ministarstava, federalnih uprava i federalnih upravnih organizacija na saniranju posljedica prirodne nesreće u Federaciji BiH za period maj - august 2014. godine

Informaciju je dostavila Vlada Federacije BiH.

Informaciju su razmatrala nadležna radna tijela i dostavila izvještaje.

U raspravi su učestvovali: Elma Đogić, Blaž Župarić, Slavica Josipović, Ibrahim Šišić, Asim Kamber, Mirsad Topčagić, Oliver Radoš i Rasim Omerović.

Predstavnički dom Parlamenta Federacije BiH primio je na znanje Informaciju o poduzetim aktivnostima Vlade Federacije BiH, federalnih ministarstava, federalnih uprava i federalnih upravnih organizacija na saniranju posljedica prirodne nesreće u Federaciji BiH za period maj – august 2014. godine.

13. Informacija o sigurnosti na području Federacije BiH za period januar – juni 2015. godine

Predsjedavajući je u uvodu kazao da je Kolegij razmatrao ovo pitanje i stava je da se ova tačka dnevnog reda za naredni period treba kompletirati i dopuniti novim spoznajama i detaljima, te da se na toj bazi predlože kvalitetni zaključci i mjere koje bi se usvojile u Predstavničkom domu.

Data je pauza pet minuta kako bi se članovi Kolegija kratko konsultovali.

Nakon kratke pauze, sa članovima Kolegija predsjedavajući je dogovorio da će se ova tačka ipak razmatrati na današnjem zasjedanju.

Informaciju je dostavila Vlada Federacije BiH.

U ime Vlade Federacije BiH dodatno obrazloženje dao je ministar Aljoša Čampara.

U raspravi su učestvovali: Nasir Beganović, Elvir Karajbić, Suzana Galić Franjka, Munib Jusufović, Dennis Gratz, Mujo Hodžić, Dževad Hodžić, Dževad Adžem, Ibrahim Šišić, Esad Bašagić, Jusuf Bubica, Oliver Radoš, Slavica Josipović, Damir Mašić, Zana Marjanović, Anela Šestić-Begović, Jasna Duraković-Hadžiomerović, Faruk Ćupina, Mehruđin Švago, Ivan Musa, Ismet Osmanović, Salmir Kaplan, Mahir Nurkanović, Mensud Borović, Ilhan Bušatlić, Amir Zukić, Sead Jusić i ministar Čampara.

Nakon diskusija, predsjedavajući je dao pauzu do 17.30, a u 17.10. sazvaio Kolegij.

Nakon pauze, nastavio se rad po 13. tački dnevnog reda.

Klub zastupnika SBB je predložio da se Dom izjasni o Informaciji o stanju sigurnosti, a ne samo da je primi na znanje, što nije usvojeno (23 glasa za, 33 glasa protiv i 24 uzdržana glasa).

Predstavnički dom Parlamenta Federacije BiH primio je na znanje Informaciju o sigurnosti na području Federacije BiH za period januar – juni 2015. godine.

Predložen je i zaključak u sklopu ove tačke dnevnog reda o kojem su se zastupnici izjašnjavali.

Sa 65 glasova za, bez glasova protiv i uz 13 uzdržanih glasova, usvojen je sljedeći:

ZAKLJUČAK

Predstavnički dom Parlamenta Federacije BiH u okolnostima vezanim uz sva događanja koja su uticala na sigurnosnu situaciju na području Federacije BiH, a koja su nastala u periodu od vremena održavanja 4. redovne sjednice, zadužuje Vladu Federacije BiH da dostavi ažuriranu informaciju o stanju sigurnosti na području Federacije BiH i sa tog aspekta predloži mjere i zaključke u okviru ustavnih i zakonskih ovlaštenja u oblasti sigurnosnog stanja u Federaciji BiH.

Tačke 14. i 15. - Usaglašavanje zakona različito usvojenih u domovima Parlamenta Federacije BiH i Izbori i imenovanja - nisu razmatrane jer po ovom pitanju nije bilo materijala za raspravu.

Predsjedavajući je zaključio rad 4. redovne sjednice u 18.13.

Transkript i prijepis transkripta sjednice čine sastavni dio Zapisnika.

v. d. SEKRETARA
PREDSTAVNIČKOG DOMA
PARLAMENTA FEDERACIJE BIH

Daniela Čegar

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BIH

Edin Mušić